

Ley pa un ley pa tur:

Procurador General mester bin cu investigacion riba placa di Spartaco Ghini..

ORANJESTAD(AAN) Ayera huez a dicta sentencia den e caso di Glenbert Croes y DOPV y huez a haya Glenbert Croes culpable di un ke otro cu a pasa cu De Palm y Willems na DOPV.

Basa riba declaracionnan haci di parti di De Palm y Willems y no mester lubida cu ta Henny Eman a manda pidi Procurador General pa laga investiga Glenbert Croes (manera cu señor Nelson Oduber a declara ayera un biha mas na radio) huez a yega na dicta su veredicto y haya Glenbert culpabel.

Mescos cu huez a haya Glenbert Croes culpabel a base di loke De Palm y Willems a declara, mescos tambe Ministerio Publico su Procurador General awor mas cu nunca mester demostra na pueblo di Aruba, cu Ministerio Publico y sigur e PG nobo no ta midi cu dos midi; ley pa un ley pa tur.

Procurador General mester bay kita tur duda di caminda tanto pa su mesun funcion como PG y tambe e organo

halto cu e ta representa y enca-beza esta Ministerio Publico, cu nan ta bay laga husticia sigui e caminda recto y cu lo bay investiga e caso di Spartaco Ghini cu a declara na Hulanda contra Prome Ministro di Aruba Henny Eman.

No por ta asina cu na Aruba dos persona ta declara contra un ministro y riba peticion di Prome Ministro Henny Eman, PG Van Daalen kende tabata pasahero na Aruba pa un temporada corto, ta core laga investiga Glenbert y impidi pa e por bira ministro y na mesun momento Henny Eman cu tin un declaracion pisa ta colga riba su cabez cu el a tuma placa na grandi di un mafioso, si ta ministeriable y pa colmo Henny Eman si tin e derecho y poder pa pidi PG laga investiga colega ministro?!

Spartaco Ghini a declara cu el a duna por lo menos 50 mil dollar na Henny Eman y Spartaco Ghini a worde sera na Italia y e placa cu Spartaco Ghini a duna Henny y AVP no ta placa sushi?

Gobierno Hulandes por sigui permiti su mes e luho di carga

e berguensa nacional y internacional di tin un prome ministro den Reino Hulandes cu a tuma placa di un mafioso manera Spartaco Ghini y nunca Ministerio Publico Hulandes y mester menciona Hulandes pasobra na Aruba keto bay ta Hulanda ta dicta den Ministerio Publico, no ta laga investiga y hiba dilanti di huez esun cu a haya placa di Spartaco Ghini?

Si Glenbert Croes no ta ministeriable pa motibo di e caso di DOPV siendo cu Glenbert ta keda para riba cu e no tabata na altura di e fraude cu e worde cometi e pregunta ta keda; Henny Eman no a admiti di a tuma placa di e mafioso Spartaco Ghini y e si por sigui ta Prome Ministro di Aruba?

Esaki no ta maneho di doble filo y un falta di respet y perdedimento di tur nocion di decencia pa cu pueblo di Aruba, pa muestra abiertamente cu tin mandatorio por haci cos contra ley y a admiti di a haya placa di un mafioso y e no ta worde persigui y otro cu ta para riba di ta inocente y no a admiti ningun momento, si ta worde persigui y sentencia?

Segun señor Nelson Oduber ta Prome Ministro Henny Eman a manda pidi PG pa laga investiga Glenbert Croes y PG a cumpli cu orden di Prome Ministro y awor ta kende tin e autoridad pa pidi PG pa laga investiga y hiba Henny dilanti di huez pa huez dicta sentencia y cabu cu e asunto aki pa semper?

Si ta Henny so por pidi PG pa laga haci investigacion contra ministronan y parlamentarianan, anto Aruba su democracia y constitucion ta mas muribundo cu esun di Venezuela cu Chavez a critica tanto asina.

No ta asina cu PG no mester di ningun autoridad na Aruba pa laga Dagvaard Henny Eman pa e bay duna cuenta den corte?

Raport Calidad no ta permiti hendenan cu a mete cu actonan contra ley pa nan por bira ministro o parlamentario y ta con gobierno di Henny Eman pa colmo hunto cu OLA mes, por sigui goberna e pais aki, si tumamento di placa di un mafioso a ser admiti na autoridadnan Hulandes?

Ta con partido OLA por hus-

tifica dilanti di pueblo cu nan lider Glenbert Croes no por bira ministro basa riba loke a pasa cu e caso DOPV y OLA mes si ta permiti pa Henny Eman cu a tuma placa di un mafioso cu a worde sera na Italia, pa e por ta nan Prome Ministro y lider di nan gabinete?

OLA a keda bira rond di e problema ayera y a papia di bay den apelacion y para tras di nan lider, pero pueblo a harta di loke ta pasando y ta exigi un investigacion profundo den e caso di Spartaco Ghini y ta exigi pa esnan envolvi bay duna cuenta den corte mescos cu a pasa cu Glenbert Croes.

Mientras cu partido OLA mes sigui permiti pa otronan cu a admiti di a tuma placa di mafioso no worde persigui, nan no por papia di husticia pa nan lider y ta OLA mes gusta pa hacha worde pasa tras di otro riba nan y cu ta den gobierno nan kier keda cueste loke cueste!

Proyecto di Radisson tambe OLA ta laga pasa riba nan cabez o tin algo di sconde na otro banda?

Gilda Arends a gradua na Hulanda



ORANJESTAD (AAN): Famia Arends-Leo a ricibi e grato noticia, cu nan yiu muher Gilda Arends a gradua como accountant na Hogeschool Brabant, na Breda, Hulanda.

Gilda lo continua su estudio pa Registeraccountant na Hulanda.

Masha pabien na Gilda y na su famianan cu e logro aki.

**TELEFONNAN
DI DIARIO
826747
FAX
828551**

AWE TA KOFFIE, MAYAN TA CHAMPAÑA!!

